

Molao oa Selekane



SABATHA MANTSIBOEA

Bakeng sa Boithuto ba Beke Ena Bala:

Exod. 19:6, Esa. 56:7, Baheb. 2:9, Deut. 4:13, Deut. 10:13, Amose 3:3, Gen. 18:19.

Teman'a Khopolo:

“Tseba ka hona hobane Jehova, Molimo oa hao, ke Molimo. Molimo o tšepelang, o bolokelang ba o ratang, ba bolokang litaelo tsa oona, selekane le mohau ho isa melokong e sekete” (*Deuteronomy 7:9*).

E ‘ngoe ea poleloana tsa bohlokoa ho Lipesalema 23 e bontša moo Molimo o lakatsang ho re isa teng. “O ntsamaisa mehlaleng ea ho loka, ka baka la lebitso la hae.” Davida o phatlalatsa temaneng ea 3. Ka lebaka la ho rata ho loka ha Hae, Molimo ha o ka ke oa re khelosa. O tla re tsamaisa litseleng tse bolokehileng leetong la rona la moea la bophelo bona. Ke “mehlala ea ho loka” e fe e bolokehileng? Sengoli sa pesalema e ‘ngoe se araba potso ena ka kopo ea thapelo: “U ntsamaisa ka tsela ea litaelo tsa hao, hobane ke ithabisetsa tsona” (Lipes. 119:35). “Litaelo tsa hao kaofela ke ho loka” (Lipes. 119:172). Molao oa Molimo ke tsela e bolokehileng, e tiileng har’a boliba ba bolotsana ba batho. Thuto ea rona bekeng ena e tsepame holim’a molao oa Molimo le sebaka sa oona seleaneng sa Sinai.

Beke ka Bokhutšoanyane: Khetho ea Iseraele e ne e bolela’ng? Khetho ea Iseraele e tsoana le ea rona joang? Molao o ne o le bohlokoa ha kae seleaneng? Na selekane se tla se se na lipehelo? Hobaneng ha kutlo e le karolo ea bohlokoa ea kamano ea selekane?

**Ithute thuto ea beke ena ho lokisetsa Sabatha sa la 22 Motšeanong.*

Khetho ea Iseraele (Deut. 7:7)

Moetlo oa se-Juda o ratile hore Molimo o entse selekane le Iseraele hobane lichaba tse ling li se hanne pele. Leha ho se na bopaki ba Bibe le ba taba ena, e toboketsa taba ea hore ka lebaka le leng le itseng, Molimo o ile oa khetha sechaba sa ba-Heberu, e seng hobane ba ne ba lokeloa ke boemo bona ba tlhomphele le tlotla eo Jehova a ba neileng eona. Ba ne ba se na makhobane ao e leng a bona a neng a ka ba etsa hore ba tšoaneloe ke lerato la Molimo le ho khethoa ha bona ho ba sechaba sa Hae. Ba ne ba fokola ka palo, sehlopha sa merabe e neng e le makhoba, ba fokola ka lipolotiki le sesole. Hape, boemong ba moetlo le borapeli, ba ne ba tsoaka-tsoakane, ba se na botebo, ba se na le tšusumetso e kaalo. Lebaka la mantlha, la ho khethoa ha Iseraele le ne le itšetlehile sephiring sa lerato le mohau oa Molimo.

Ka nako eona eo, leha ho le joalo, re lokela ho ba hlokolosi ha re talima taba ena ea khetho, hobane e ka ba le monyetla oa hore re fose thuto ea Molimo. Molimo o ile a khetha Iseraele hobaneng? E ne e le hore ba lopolloe, ha e mong le e mong a khethiloe hore a neno 'me a lahloe? Kapa ba ne ba khethiloe e le ba tla fa lefatše seo ba se fuoeng? Litimana tse latelang li re thusa joang ho utloisisa likarabo tse lipotso tsee?

Exod. 19:6

Esa. 56:7

Baheb. 2:9

Joalo ka Baleti ba Letsatsi la Bosupa, re rata ho italima re le Iseraele ea matsatsi a kajeno, e bitsitsoeng ke Jehova, e seng hore e be rona feela ba lopollotsoeng empa e le ho phatlalatsa molaetsa oa topollo, moelelong oa molaetsa oa manyeloi a mararo, ho o tsebisa lefatše. Ka bokhutšoanyane, re lumela re na le litaba tseo re lokelang ho li phatlalatsa tseo ho seng motho e mong ea li phatlalatsang. Bona ke bona boemo boo Iseraele ea khale e neng e le ho bona. Khetho ea Iseraele ea khale e ne e sa rereleoa ho fetola sechaba sa ba-Heberu mokhatlo o khethollang, o ipoloketseng tšepiso ea pholoho le topollo bakeng sa bona. Ho fapana le moo, haeba re lumela hore Krete o shoetse batho bohle (Baheb. 2:9), le topollo eo Jehova a e etselitseng Iseraele e ne e le ea lefatše lohle. Iseraele e ne e le sesebelisoa seo ka sona topollo ena e ne e lokela ho tsebahatsoa. Kereke ea rona e bilelitsoe ho etsa mosebetsi o tšoanang.

Sheba mosebetsi oa hau ka kerekeng. Ke eng seo u ka se etsang ho phahamisa mosebetsi oo re bilelitsoeng ho u etsa? Hopola, haeba u sa phathahana ka ho thusa, ho bonolo hore e be, e ka ba u eme ka tseleng.

Maqhama a Tlamang

“A le tsebisa selekane sa hae, seo a le laetseng hore le etse ka sona, mantose a leshome; ‘me a a ngola matlapeng a mabeli” (Deut. 4:13).

Ho sa natse hore esale re toboketsa hakae hore selekane kamehla ke selekane sa mohau, hore empa feela e le tholoana ea hore e be Molimo o fana ka molemo o sa lokeloang ke ba kenang kamanong e pholosang le eena, mohau ha se tumello ea ho hloka kutlo. Ho fapana le hoo, selekane le molao li tsamaea hammoho: hantle-ntle ha li arolehe.

Sheba temana e qotsuoeng kaholimo. E hokahanya molao le selekane ka matla a makae? Ke joang e bontšang hore na molao ke oa mantlha ha kae selekaneng?

Ha u ntse u nahana ka hore na selekane ke eng, taba ea molao e le ea bohlokoa-hlokoa ke ntho e utloahalang. Ha re utloisisa selekane le le har’a ntho tse ling, kamano, ho ea lokela hore ho be le melaoana le meeli e sehoang. Lenyalo kapa setsoalle kapa khoebo e kopanetsoeng e ne e tla nka nako e kae haeba ho ne ho se na meeli kapa melaoana, e ka ba e ngotsoeng ka ho hlaka kapa e sa ngoloang? Monna e be o ikhethela ho ba le kharebe kapa motsoalle a khethe ho ikukela chelete ea e mong kapa molekane e mong khoebong e be o mema e mong ho ho ba karolo ea khoebo a sa tsebisa molekane e mong. Liketso tsena e ne e tla ba tlolo ea melaoana, le melao, le litšiea. Likamano tsee li ne li tla nka nako e kae li le teng tlas’a ho maemo a joalo a ho hloka taolo? Ke kahona ho lokelang ho be le meeli, ho sehoe mela, ho thehoe melaoana. Ke ka tsela ena feela kamano e ka bolokoang.

Hantle-ntle, lipolelo tse ngata joalo ka molao (Lipes. 78:10) melaoana (Lipes. 50:16), mapaki (Ps. 25:10), litaelo (Ps. 103:18), le lentsoe la Jehova (Deut. 33:9) a fumanoa a tsamaellana kapa a na le kamano e haufi le (haeba e se moelelo o le mong) lentsoe selekane. Ho hlakile “mantsoe a selekane sena” (Jer. 11:3, 6, 8) ke mantsoe a molao, melaoana, mapaki, le litaelo tsa Molimo. Selekane sa Molimo le sechaba sa Hae sa Iseraele se ne se na le lintho tse ngata tseo se li hlohang tse leng bohlokoa bakeng sa ho boloka kamano eo a neng a e batla le sechaba sa Hae. Na ho fapane kajeno?

Nahana ka motho e mong eo u nang le kamano e haufi le eena. Joale, nahana na ho ne ho tla etsahala eng ka kamano eo haeba u ne u utloa ho se na melaonana, litloaelo le melao e u tlamang empa e be u nahana hore u na le bolokolohi bo felleltseng ba ho etsa eng kapa eng eo u e batlang. Leha u ka re u rata motho eo ‘me ke lerato feela le tla etsa qeto ea hore u amana joang le eena, hobaneng ho ntse ho hlokahala melaoana leha ho le joalo? Buisanang.

Molao Kahar’a Selekane (Deut. 10:12, 13)

Mehopolo e tlang pele kelellong ea hau ha ho buuo ka molao ke e fe? Mapolesa, litekete tsa tseleng, baahloli, le chankana? U nahana ka lithibelo, melaoana, batsoali ba hatellang, le kotlo? Kapa, mohlomong, u nahana ka taolo, kutloisisano, botsitso? Kapa le lona lerato?

Lentsoe la se-Heberu torah, le fetoletsoeng e le “molao” Libibeleng tsa rona, le bolela “thuto” kapa “taeo.” Lentsoe leo le ka sebelisoa ho hlalosa litaelo tsohle tsa Molimo, e ka ba tsa boitšoaro, sechaba, phelisano, kapa borapeli. Le bolela likeletso tsohle tsa mohau tseo Molimo esale o li fa sechaba sa Hae, hore ba tle ba bone bophelo ka ho fetisisa, ba nama le ba moea ka bobeli. Ha ho makatse hore mopesalema o re ho lehlohonolo motho ea “ithabela[ng] molaong oa Jehova, molao oa oona a o nahana motšea le bosiu” (Lipes. 1:2). Ha re bala molao kapa Torah—litaelo kapa lithuto tse ngotsoeng libukeng tsa Moshe tse ileng tsa fetoha karolo ea selekane sa Iseraele—re bona lethala la litaelo le pharalletseng. Molao o ne o ama mekhahlelo eohle ea bophelo ba Iseraele—temo, puso, likamano tsa batho, le borapeli.

U nahana ke hobaneng ha Molimo o fane ka litaelo tse ngata ha kaalo bakeng sa Iseraele? (Sheba Deut. 10:13.) litaelo tsee li ne li le “molemong” oa bona ka litsela li fe?

Mosebetsi oa “molao” kahar’a selekane e ne e le ho fana ka tataiso ea bophelo bo bocha motho-molekane oa selekane. Molao o tsebisa setho sa selekane thato ea Molimo, eo motho a e tsebang ka botlalo ba eona ka kutlo ea tumelo ho litaelong tsa Hae le boipolelo bo bong ba thato ea Hae. Karolo e bapaloang ke molao kamanong e phelang ea selekane e bontša hore Iseraele e ne e sa lokela ho latela litsela tsa lichaba tse ling. Ba ne ba sitoa ho phela ka molao oa tlhaho, lithoko tsa botho, litakatso, kapa le tsa likamano, lipolotiki, le lithoko tsa moruo feela. Ba ne ba lokela ho tsoela pele e le sechaba se halalelang sa Molimo, ‘muso oa baprista, le letlotlo le khethehileng ha feela ba latela ntle ho qeaqea thato eo ba e senoletsoeng ea Molimo o entseng selekane mafapheng oohle a bophelo.

Joalo ka Iseraele ea khael, Baleti ba Letsatsi la Bosupa ba fuoe likeletso tse pharalletseng tse amanang le mokhahlelo o mong le o mong oa bophelo ba Bokreste ka neo ea boporofeta ea mehla ea kajeno. Hobaneng e lokela ho talima likeletso tsee e le mpho e tsoang ho Molimo ho e-na le ho bona e le tšitiso ea bolokolohi ba kelello le liketso? Ka nako e tšoanang, re ka ba kotsing e fe ea ho fetola mpho eo ntho feela ea molao, joalo ka ha ba-Iseraele ba ile ba etsa ka lineo tsa bona? (Sheba Baroma 9:32.)

Botsitso ba Molao oa Molimo

Boteng ba Molao oa Molimo kamanong ea selekaneng bo re ruta ‘nete e fe ka Molimo mabapi le sebopeho sa Hae sa mantlha? Mal. 3:6, Jakobo 1:17.

Molao oa Molimo ke polelo ea molomo kapa e ngotsoeng ea thato ea Hae (bapisa Lipes. 40:8). Ka hobane ke tlhaloso ea semelo sa Hae, boteng ba oona selekaneng bo re nea tiiso ea boteng ba kamehla le botšepahi ba Molimo. Lehra re ka sitoa ho bona tšebetso ea mehauhelo ea Hae kamehla, rea tseba hoba oa tšepaha. ‘Mopo oohle oa Hae o tlas’a melao ea boitšoarole le ea tse tšoarehang e sa fetoheng. Ke eona taba ena e re fang tokoloho ea ‘nete le tšireletseho. “Tiisetso ea hore Molimo oa tšepahala ‘me re ka itšetleha ka Eena e lutse ‘neteng ea hore ke Molimo oa molao. Molao oa Hae le thato ea Hae ke ntho e le ‘ngoe. Molimo o bitsa ho nepahetseng hore ho nepahetse hobane ho hlalosa likamano tse tšoang pele tse ka bang teng. Kahona, molao oa Molimo ha o tsamaee ka maikutlo a motho ho latela takatso ea hae ka nako e itseng. Ke ntho e tsitsiseng ho feta tsohle ‘mopong ohle oa Molimo.” — Walter R. Beach, *Dimensions in Salvation* (Washington, D.C.: Review and Herald Publishing Association, 1963), leq. 143.

Haeba molao oa Molimo o sitoa ho pholosa motho sebeng, hobaneng a o entse karolo ea selekane? (Temoso: sheba Amose 3:3.)

Kamano e hloka tumellano le kutloano. Hobane Molimo ha se’Mopi oa lefatše feela empa ke ‘Musi oa lona oa boitšoarole, molao o bohlokoa bakeng sa thabo ea libopuo tsa Hae tse nang le boinahano hore li tle li phele ka kutloano le Eena. Molao oa Hae, ka mokhoa o joalo ke molao-theo oa ‘muso oa Hae. Ke tloaelo kapa setlamo sa tlhophiso ea selekane le kamano. Sepheo sa oona ha se ho pholosa, empa ke ho hlalosa boikarabello ba rona ho Molimo (melao oa 1–4) le boikarabello ba rona ho batho ba habo rona (molao oa 5–10). Ka mantsoe a mang, o hlalosa tsela ea bophelo eo Molimo a e batlang bakeng sa sechaba sa Hae sa selekane, molemong oa thabo le boiketlo ba bona. O ne o thibela Iseraele ho sebelisa maikutlo a mang bakeng sa ho ba oona tsela ea bophelo. E ne e le, e bile e ntse e le morero oa kamano ea selekane ho tlisa molumeli kutloanong le thato le semelo sa Molimo ka mohau oa Molimo o fetolang.

Talima ka mahohle. A na ha u bone litholoana tse nyarosang tsa ho hloka molao? Le bophelong ba hau, a na ha u bone tšenyō e etsahalang hobane u tlotse molao oa Molimo? Linnete tsee li re thusa ho tiisa molemo oa molao oa Molimo le lebaka leo ka lona molao o lokelang ho ba karolo ea bohlokoa ea kamano ea rona le Eena joang?

Ha. . .

Sheba litemana tse latelang. Li tšoana ka ntlha e fe kaofela ha tsona, ‘me e ruta eng ka sebopeho sa selekane?

Gen. 18:19

Gen. 26:4, 5

Exod. 19:5

Lev. 26:3

Molimo o ananela kutlo le botšepahi ba Abrahamana phatlalatsa ho “mekhoa ea ka, le litaolo tsa ka, le litaolo tsa ka” (Gen. 26:5). Ho tšoaela hore ekare Molimo o ne o lebelletse mokhoa oa joalo oa bophelo bo molekane oa Hae oa motho seleaneng. Polelo e felletseng ea selekane sa Bibehe Sinai e fana ka bopaki bo hlakileng hore lipehelo tsa kutlo ke lintlha tse ling tsa mantlha tsa selekane. Exoda 19:5 e hlakisitse hore, “Ha le ka la feela la utloa. . . . “Hore selekane se na le lipehelo ke taba e sa latoleheng; leha li fanoa ka mohau, leha ba sa li sebeletsa, leha e le mpho ho bona, litšepiso tsa selekane li ne li sa tle ho se lipehelo. Batho ba ne ba ka hana mpho, ba latola mohau, ba furalla litlthonolofatso. Selekane, joalo ka pholoho, ha se sitise bolokolohi ba kelello. Jehova ha a qobelle motho ho ba likamanong tse bolokang le Eena; ha a ba qobelle selekane. O se nea e mong le e mong ka bolokolohi; e mong le e mong o mengoa hore a se amohele. Ha a se amohela, tse tlamang ke hona li latelang, e seng e le tsela ea ho fumana litlthonolofatso tsa selekane empa e le ponahatso ea ho amohela litlthonolofatso tsa selekane. Iseraele e lokela ho mamela, e seng hore e tle e amohele litlthonolofatso empa e le hore litlthonolofatso li tle li phethahatsoe ho eena. Kutlo ea hae e ne e le ponahatso ea seo ho hlolonolofatsoa ke Jehova ho leng sona. kutlo ha e reke litlthonolofatso, ka hore Molimo o tlamehileho li tlisa; ho na le hoo, kutlo e hleka sebae sa moo tlthonolofatso ea tumelo e ka bonahatsoang.

“Le tsamaee ka mokhoa o phethehileng tseleng eo Jehova, Molimo oa lona, a le laetseng eona, le tle le phele, le be lehlohonolo, ‘me le atise matsatsi a lona lefatšeng leo le eang ho le rua” (Deut. 5:33). Na Jehova o re ho Iseraele moo ha ba ka mamela tla iphumanela litlthonolofatso, hore litlthonolofatso tsee ke seo sechaba se li kolotoang? Kapa o re: ha le ka mamela, li tlthonolofalo tsena li tla ba teng hobane kutlo e bula tsela ea hore ‘Na ke tsebe ho le tlisetsa litlthonolofatso?

Ho Ithuta Haholoanyane:

Bala Ellen G. White, “Ntoa,” maq. 607, 608 ho *The Desire of Ages*; le “Molao le Lilekane,” maq. 363–373, ho *Patriarchs and Prophets*. Mattheu 22:34–40 e re thusa ho utloisisa joang (1) sebaka le moelelo oa molao oa Molimo har’a selekane sa Hae le (2) taba ea hore selekane se bolela ntho e tsoanang le kamano? “E ka khona lerato le be teng ka pelong pele motho a ka, ka matla le ka mohau oa Krete, qalang ho boloka litaelo tsa molao oa Molimo (cf. Baroma 8:3, 4). Kutlo kante ho lerato ha e khonahale joalo ka ha e se na thuso. Empa moo lerato le leng teng ho motho ho tla iketsahalla feela hore a qalella ho hlophisa bophelo ba hae hore bo lumellane le thato ea Molimo joalo ka ha e boletsoe litaelong tsa Hae.”—*The SDA Bible Commentary*, pok. 5, leq. 484. “Litaelong tsa molao oa Hae o halalelang, Molimo o fane ka puso e phethehileng ea bophelo; o phatlalalitse hore ho isa bofelong ba nako molao ona, o sa fetoloa leha e le jota kapa tlhaku, o tla lula o na le seo o se hlokang holima batho. Krete o tlike ho phahamisa molao le ho tlotlisa. O ile a bontša hore o theiloe holim’a motheo o pharalletseng oa lerato ho Molimo le lerato ho motho, le hore ho u boloka ke eona tsoanelo eohle ea motho. Bophelong ba Hae o fane ka mohlala oa kutlo ea molao oa Molimo. Thutong ea Thabeng, o bontšitse kamoo seo o se hlokang ho fetisang liketso feela tse bonahalang kante ‘me o ela hloko le mehopolole me rero ea pelo.”—Ellen G. White, *The Acts of the Apostles*, leq. 505.

Lipotso tsa Puisano:

1. Hobaneng ha khoele ea lerato e na le matla a fetang thapo ea tšabo ho atametsa batho ho Molimo?
2. Hobaneng ha taelo ea ho “ ‘Rata Morena, Molimo oa hao, ka pelo ea hao eohle, le ka moea oa hao oohle, le ka khopolo ea hao eohle’ ” (Matt. 22:37) e le molao oa pele le o moholo ka ho fetisisa?
3. Simone Weil o kile a ngola hore, “ ‘Taolo ke tlhoko ea pele ea bohle.’ ” (e qotsuoe ho Russell Kirk, *The Roots of American Order* [Washington, D.C.: Regnery Gateway, 1992], leq. 3). U utloisisa mantsoe a hae joang moelelong oa thuto ea beke ee, haholo-holo mabapi le taba ea molao?

Kakaretso: Molao oa Molimo e ne e le karolo ea mantlha ea selekane. Feela, e ne e le selekane sa ‘nete sa mohau. Mohau, leha ho le joalo, ke tsela eo ka eona mohau o bonahatsoang le ho hlalosoa bophelong ba ba o amohelang.